

續古文苑
五



苑文古續

(五)

輯衍星孫

叢書集成初編

(補印本)

續

古

文

苑

五

冊

一九四〇年六月初版

一九五九年十月補印

孫 星 衍 輯

商務印書館出版

上海虹口印刷廠印刷

續古文苑卷第十八

賜進士及第授通奉大夫山東通省督糧道加三級孫星衍撰
碑志四

大唐朝散大夫行潤州句容縣令岑君德政碑

唐張景毓

蓋聞諸易曰有天地然後有萬物有萬物然後有君
臣有君臣然後有上下然則星辰爲緯上陵山險所
以經啓八紘彌綸萬域者也聲明文物禮樂詩書所
以黼藻生靈化成邦國者也至於高居萬乘富有四
海爲而不宰裁成於孕育之先感而遂通囊括於混
元之首雖柔來剛往乾坤之軌躅可尋而步帝馳王

雲火之深塵不昧則疇咨四岳允釐百工大則鶴鼎
魚璜錫寵於機衡之地小則緇幡墨綬守位於子男
之國其有相門紬緒王佐推才負揭仁義周旋禮節
排九流而迴出掩三異而孤昇緝諧吐吏綏和風俗
堂上堂下驅密賤於後塵星出星入置馬期於散地
閒而以肅嚴而不殘馳心於廊廟之前■迹于江湖
之上者獨在于岑君乎君名植字德茂南陽棘陽人
也其先出自顓頊氏后稷之後周文王母弟輝剋定
殷墟封爲岑子今梁國岑亭即其地也因以爲姓代
居南陽之棘陽十三代孫善方隨梁宣帝西上因官
投迹寓居於荊州焉自軒階垂祉姜汭開宗神岳構

其嵯巘靈根肇其枝葉其在佐帝師王封侯尚主十
卿五公之貴七珥三組之榮衣冠燭耀於區寓允緒
綿聯於載籍亦由秦移趙璧魏得隋珠不常厥地所
在稱寶何止梁亭漢室先開佐命之封吳郡荆門晚
葺因居之地若斯而已哉高祖善方梁驃騎大將軍
周起部尚書開府儀同三司長寧縣開國公食邑一
千二百戶贈侍中謚曰敬當萬機之損益成八座之
儀表銀艾圭茅金鏘玉振榮高當代龍豹之託逾深
寵茂幽局鵷鸞之寄斯重曾祖之爲隋虞部員外侍
郎襲爵長寧公霞騫電邁鳳彩龍光初膺星鳥之榮
晚襲山河之寵祖文本皇朝中書令兼太子賓客宏

文館學士江陵縣開國伯食邑四百戶贈侍中謚曰惠宏材巨量經文緯武高標百尋絕壁千仞丹青神化翊亮天工即隆周之申甫亦皇軒之風力若乃百揆務殷三階事切西朝機要之所北閣神仙之地任摠訏謨榮高密勿至於五車萬卷百家諸子吐鳳懷蛟凌雲槩日不尚浮綺尤存典裁藻翰之美今古絕倫父景倩周大中大夫行麟臺著作郎兼宏文館學士綰青襟而司禮館草元經而登書閣聲榮之重驛美於當朝燕翼之寄傳徽於後烈君紫泉飛液丹山耀彩孤峯懸日月之輝激溜聚烟雲之氣虛心倜儻靈鶴再舉而未窮逸調從橫大鵬六月而方息生而

好學。幼而知禮。孝行無待於傍授。仁心得之於自然。黃憲之類。顏回。汝南爲貴。賀循之擬。龔勝。江東擅名。不學左思。十年爲賦。聊同方朔。三冬讀書。不出戶庭。旣馳心於萬里。將排雲日。亦因基於一匱。弱冠以簪纓貴胄。調補修文生。明經擢第。緇帷連夕。拜之所。紫禁迤朝。聞之地。圖書所會。館宇生光。解褐同州。叅軍事。譽警北曹。聲馳南府。地靈天秩。渾金璞玉之材。主吏叅卿。孫楚。蕭何之德。屬軒塋卜遠。禹山斯會。撫遺劒而空存。想遊冠而無及。松蘿漢隧。竹染湘川。雖鏤鼎銘彝。將勒生金之字。而庇徒藏事。終資倚玉之材。課効居多。恩腴俯逮。特授蒲州司戶叅軍事。俄以親

累左授夔州雲安縣丞賈誼長沙屈原湘水溪連五
毒攀鳥路而銜悽峽帶三巴聽猿聲而下淚秩滿丁
府君憂去職三年泣血七日絕漿殆不勝喪幾於滅
性服闋調補衢州司倉叅軍事秦稽負日楚夢含雲
東連射的之山西拒沈珠之浦上農攸屬倉廩爲禮
節之先下位斯安等列處儕流之首尋沐恩旨雪其
親累一遇雲雷之施再生花萼之榮旣席寵而沿恩
亦流根而泊葉君之兄義材望冠時聲名動俗膺奮
飛而首出指寥廓而曾騫位纔陟於聞鶯才實兼於
緣鵠旣而八龍雙驥慈明與劉岱均飛二陸三張仕
衡與孟陽齊價豈直家風祖德見稱於中旨掌紼司

綸復傳於後葉。光輝所燭。朝野增榮。然則宅火均司。象雷分邑。莊周著小鮮之誠。尹何招美錦之嫌。列五等於姬封。高十城於漢秩。字育之道。循良是資。擢授潤州句容縣令。瑤山奧壤。金陵舊地。郊原枕端。委之墟。江漢擁朝宗之水。海潮驚而翔鷺起。山氣合而盤龍見。物產殷積。水陸兼并。人多挺劍之雄。俗有亡珠之弊。君達於時事。明於政理。教不嚴而自肅。化不令而人從。吐黎感惠。愛之如父母。奸邪屏迹。畏之若神明。戶口滋豐。田疇墾闢。行太丘之道德。息灌壇之風雨。國家下武膺運。中興纂業。氛祲廓除。日月開朗。君遇見知之主。逢時來之運。若魚縱壑。如鴻順風。優制

所尊崇班益峻加朝散大夫上柱國紫泥流渥朱紱
昇榮列五采之通班連九章之賁飾於是貴而思降
盈而知損如絲之旨載流亂繩之化愈息先是邑居
湫阨里閭榛蕪爰自歷政未遑加緝君乘三餘之隙
因四人之暇覽山川之體勢量資物之豐省逐便興
功因時改作人無廢業役不浹辰流一切之權道成
累代之宏業頃緣稼穡頗■炎亢雲漢之詠徒勤京
坻之望斯絕君親加暴露徧請山川率吐庶以具馨
香俯壇場而展誠敬濃雲布族膏雨成絲絲八極而
俱灑通四溟而廣徧自非仁心所及誠感必通其孰
能預於此乎加以道尚朋執情敦讌喜每至星搖劍

室月下珠潭。菱津迴棹。女之喧桃。逕詠樵童之樂。臨
萬家之井邑。眺千里之風煙。良談閒起。清文不輟。信
可謂兼文兼武。公才公望者焉。聖上深視九重。高居
萬寓。廼睠時政。分命使司。端冕旒而思天下。布德澤
而周海內。博訪英髦。探求異術。十道飛駟。萬域承風。
江東黜陟。使朝散大夫行度支員外郎攝右臺侍御
史源乾曜。崖岸孤聳。風飈秀出。千仞罕節。百尺無枝。
地入星臺。列珠軒而應翟。庭分月樹。搖鐵柱而驚鳥。
冰霜凜白。簡之威霞。日聚繡衣之色。遙同李邵。上迴
星鳥之暉。俯類張綱。先懾權豪之氣。以君才地。加之
聲實。每肆揄揚。先膺荐舉。王生千里。佇入於匡。佐荀

氏十旬行登於台府顧眄之重郡縣增榮馳表䟽於
龍閣遽翻飛於鶯路隨郅詵而齊舉攀鄧攸而不留
黯黯津亭搖搖軒騎壽春遺牘將折轅而共分葉縣
歸鳬逐行舟而俱遠由是三吳士庶二江人物來暮
之歌方遠去思之戀益深期歿君於一年思段侯之
再撫承魏烜家承軒冕代傳儒墨鳴謙自牧處劇若
閑以涵牛之巨量貳割鷄之小道主簿崔子佺相門
卿族玉葉金柯光彩可以射人風神可以凜俗尉李
芬張隱朝章佩嘉勗等並公侯復祉琳瑯積譽經史
足用刀筆推工暫迴東道之姿多屈南昌之化鄉望
等或者年宿望或盛族名家負雲澤之懷寶馳水鄉

之俊逸山川舊迹龍蟠武踞之閒軒冕餘風東箭南
珍之亞並殮和浴道多從食椹之恩老安少懷久沐
惟桑之化雖功成帝力上皇之耕鑿已勤而事稟圖
經下邑之風猷可紀是用傍遵縑簡俯緝謳謠覈南
襄之故事採西郭之前躅飛丹屑瓦行杼雕金之思
相質披文無媿沈碑之浦其詞曰

山岳■氣河汾孕爲基構百尋源流千丈地靈夬軋
天姿矜蠻長寧建侯襟懷洞朗江陵奕載風颯峻上
蹟隱鉤深知來藏往斲雕爲朴用晦而明文緯天地
武定縱橫如周稷禹似漢良平金社開封珠盤載盟
逃矣遐緒猗歟克生

案碑詞每段六韻唯此明橫平
盟生僅五韻必脫去二句也未

見拓本姑識此以俟再補乘彼靈慶光斯燕翼道映時宗言爲士
則月鏡虛湛雲峯迴植藝蘊縑緗材經邦國金玉其
行筠篲其德鶴鳴不已鴻飛未息欲麗九成先階一
匱比迹庠序聯芳旌旆軒塋卜遠禹山云萃倚玉推
才雕金纂懿秦關漢輔吳田穉地孫楚叅卿蕭何主
吏鴻鐘待扣明鏡不疲詞端筆杪月落雲披時更出
處道或推移曾叅盡孝賈誼傷離五湖東指三峽西
窺六修齊稟百里均知帝道光亨聖人有作如鵬得
吹似魚縱壑越自奮飛載翔廖廓珠江控海金陵負
郭夏禹經營農皇甄度星躔牛斗雲連蜃閣令長何
擇循良在茲駢駕宓賤雕鏤馬期政實無擾人稱不

欺韋弦是緝冰玉攸資神憂河甸獸斷江湄蝗去無
限鸞歸有時八使出關二星向蜀乘驄衣繡揚清激
濁黜陟攸先椎埋是屬上敷帝念下從人欲一聽謳
謠載欣風俗行收顧眄坐成珠玉若管知鮑如蕭待
王君子既見爲龍爲光選衆而舉載掄載揚飛日
路驛薦雲莊眇眇雲澤颺颺水鄉西北萬里東南一
方坐結去思長嗟來暮躑躅輦壤怊悵鸞路何以報
恩宸階遠訴何以旌德高碑迴樹潘岳創詞楊修辨
句一刊懿迹千齡垂裕
景龍二年歲在戊申二
月十五日建朝散大夫行雍州錄事叅軍張景毓字
燭微撰業行寺主釋翹微書

唐故朝議郎行兗州都督府方與縣令獨孤府

君之碑銘

唐劉待價

聞夫軋蓋上闢星緯分其經舍坤輿下蟠河岳裂其封域是以觀象體物建百里之庶邦敦俗牧人置千石之多士則有威霽風雨稱明鏡於當時德洽絃歌号元龜於後葉其有繼美宣化教肅刑清作根本於巖廓爲喉命於黔庶休明一代映徹九泉歷選徽塵歸獨孤府君矣公諱仁政字仁政河南洛陽人也本姓劉氏導擾龍之巨源長河不竭䟽斷蛇之冒岫連岳無窮屬逐鹿於中原乃避時於北漠因山易姓以氣雄邊及魏室之鬱興服袞論道遷周邦而扈從衣